



ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ԵԶՐԱԿԱՑՈՒԹՅՈՒՆ 07/2022-2023

ԳՈՒՐԳԵՆ ԲԱԲԿԵՆԻ ԱՐՍԵՆՅԱՆԻ ԿՈՂՄԻՑ ԱՆՀԱՄԱՏԵՂԵԼԻՈՒԹՅԱՆ ՊԱՀԱՆՋՆԵՐԻ ԽԱԽՏՄԱՆ ԲԱՑԱԿԱՑՈՒԹՅԱՆ ՎԵՐԱԲԵՐՅԱԼ

ք. Երևան

27 փետրվարի, 2023 թվական

Կոռուպցիայի կանխարգելման հանձնաժողովը, կազմով՝ Հ. Հարությունյանի, Ն. Համբարձումյանի, Մ. Գալստյանի, Լ. Ալեքսանյանի, (այսուհետ՝ Հանձնաժողով), քննության առնելով Գուրգեն Բաբկենի Արսենյանի կողմից անհամատեղելիության պահանջների առերևույթ խախտման վերաբերյալ 2022 թվականի նոյեմբերի 30-ին հարուցված թիվ 07/2022 վարույթի նյութերը.

պարզեց.

1. Նախապարմություն

Հանձնաժողովը, հիմք ընդունելով «Կոռուպցիայի կանխարգելման հանձնաժողովի մասին» օրենքի 23-րդ հոդվածի 1-ին մասի 1-ին կետը և հաշվի Հանձնաժողովի հանրային ծառայողների վարքագծի վերահսկողության վարչության 2022 թվականի աշխատանքային ծրագրով հաստատված միջոցառումներով նախատեսված՝

Հանձնաժողովի կողմից Ազգային ժողովի պատգամավորների անհամատեղելիության պահանջների պահպանման ստուգման շրջանակում իրականացված Գուրգեն Բաբկենի Արսենյանի 2021 թվականի տարեկան շահերի հայտարարագրում (այսուհետ՝ Հայտարարագիր) ներկայացված համապատասխան տվյալների ստուգման արդյունքները, արձանագրել է հետևյալը.

1. Իրավաբանական անձանց պետական ռեգիստրի տվյալների համաձայն՝ Գուրգեն Բաբկենի Արսենյանը 2016 թվականի դեկտեմբերի 28-ից հանդիսանում է «Յունիքորն Սերվիս» ՍՊ ընկերության (ՀՎՀՀ 00161529) 100 %-ի բաժնետեր:

2. Իրավաբանական անձանց պետական ռեգիստրի տվյալների համաձայն՝ Գուրգեն Բաբկենի Արսենյանը հանդիսանում է «Յունիքորն Գրուպ» ՓԲ ընկերության (ՀՎՀՀ 00087766) 100 %-ի բաժնետեր:

3. Գուրգեն Բաբկենի Արսենյանի կողմից 2021 թվականի գույքի, եկամուտների, շահերի և ծախսերի տարեկան հայտարարագրի Բ.3 «Արժեթղթեր և այլ ներդրումներ» բաժնում ներկայացված տվյալների համաձայն՝ Գուրգեն Բաբկենի Արսենյանը հանդիսանում է «Վկրեդիտ 24» ՍՊ ընկերության 13 %-ի բաժնետեր:

4. Գուրգեն Բաբկենի Արսենյանը Հայտարարագրում «Յունիքորն Սերվիս» ՍՊ, «Յունիքորն Գրուպ» ՓԲ և «Վկրեդիտ 24» ՍՊ ընկերություններում բաժնեմասնակցության, ինչպես նաև իր բաժնեմասը հավատարմագրային կառավարման հանձնելու վերաբերյալ տվյալներ չի հայտարարագրել:

5. Գուրգեն Բաբկենի Արսենյանը Ազգային ժողովի պատգամավորի պաշտոնը ստանձնել է **2021 թվականի օգոստոսի 2-ին**:

6. 2022 թվականի նոյեմբերի 30-ին Հանձնաժողովը կայացրել է թիվ 07/2022 որոշումը՝ Ազգային ժողովի պատգամավոր Գուրգեն Բաբկենի Արսենյանի կողմից անհամատեղելիության պահանջների առերևույթ խախտման հիմքով վարույթ հարուցելու մասին:

7. 2022 թվականի դեկտեմբերի 5-ին թիվ Ե-01/3010-2022 գրությամբ վարույթ հարուցելու մասին որոշումը սուրհանդակային ծառայության միջոցով ուղարկել է Գուրգեն Արսենյանին՝ միաժամանակ պահանջելով ներկայացնել պարզաբանում «Յունիքորն Սերվիս» ՍՊ, «Յունիքորն Գրուպ» ՓԲ և «Վկրեդիտ 24» ՍՊ ընկերություններում իր բաժնեմասը հավատարմագրային կառավարման հարձնելու հարցի առնչությամբ և դրան

կցել փաստարկների հիմնավորվածությունը հավաստող նյութեր, ինչի հետադարձ հավաստումը չի վերադարձվել Հանձնաժողով:

8. 2022 թվականի դեկտեմբերի 28-ին ՀՀ ազգային ժողովի նախագահին է հասցեագրվել թիվ Ե-01/3225-2022 գրությունը, ինչպես նաև հանձնման ենթակա փաստաթղթերը՝ փակ ծրարով, Գուրգեն Արսենյանին ուղղված ծանուցումն անձամբ նրան հանձնելու խնդրանքով, որը և հանձնվել է վերջինիս 2022 թվականի դեկտեմբերի 30-ին (հիմք՝ 01/3225-2022 ուղեկցող գրություն, Գ.Արսենյանի ստորագրությամբ)

9. 2022 թվականի հունվարի 16-ին Գուրգեն Արսենյանի կողմից Մ-178-2023 մտից գրությամբ Հանձնաժողով է մուտքագրվել դիրքորոշում՝ կցելով «Յունիքորն Գրուպ» ՓԲ, «Յունիքորն Սերվիս» ՍՊ և «Վկրեդիտ 24» ՍՊ ընկերություններում իր ունեցած բաժնեմասերը հավատարմագրային կառավարման հանձնելու վերաբերյալ 2021 թվականի հունիսի 20-ի պայմանագիրը՝ կնքված իր և Հռիփսիմե Նորայրի Ավետիսյանի միջև:

10. «Յունիքորն Գրուպ» ՓԲ, «Յունիքորն Սերվիս» ՍՊ և «Վկրեդիտ 24» ՍՊ ընկերություններում իր ունեցած բաժնեմասերը հավատարմագրային կառավարման հանձնելու հարցի վերաբերյալ տվյալներ ստանալու, ինչպես նաև անհամատեղելիության պահանջների պահպանման, հնարավոր այլ խախտումներ ի հայտ բերելու նպատակով ուսումնասիրվել են Արդարադատության նախարարության իրավաբանական անձանց պետական ռեգիստրի էլեկտրոնային միասնական գրանցամատյանում առկա տվյալները, ինչպես նաև կատարվել են հարցումներ 2023 թվականի հունվարի 19-ին, հունվարի 20-ին և հունվարի 25-ին և փետրվարի 7-ին ՀՀ պետական եկամուտների կոմիտե, 2022 թվականի դեկտեմբերի 28-ին և 2023 թվականի հունվարի 12-ին՝ Արդարադատության նախարարության իրավաբանական անձանց պետական ռեգիստրի գործակալություն, և 2022 թվականի դեկտեմբերի 28-ին՝ ՀՀ կենտրոնական դեպոզիտարիա:

II. Վարույթի մասնակցի ներկայացրած դիրքորոշում ու պարզաբանումներ.

2022 թվականի դեկտեմբերի 5-ի Հանձնաժողովի Ե-01/3010-2022 գրությանն ի պատասխան Գուրգեն Արսենյանը ներկայացրել է դիրքորոշում՝ հետևյալ հիմնավորումներով.

Գուրգեն Արսենյանը նշել է, որ 2001 թվականից սկսած չի հանդիսացել անհատ ձեռնարկատեր, չի զբաղեցրել գործադիր մարմնի ղեկավարի պաշտոն: Առաջնորդվելով ՀՀ Սահմանադրության 95-րդ հոդվածի պահանջներով՝ 2021 թվականի հունիսի 20-ին հավատարմագրային կառավարման է հանձնել ստորև նշված կազմակերպություններում իր ունեցած բաժնեմասերը: Միաժամանակ նշել է, որ մինչ այդ ժամկետը նույնպես չի զբաղվել նշված ընկերությունների կառավարմամբ և դրանցում չի զբաղեցրել որևէ պաշտոն:

Գուրգեն Արսենյանը գրությանը կից ներկայացրել է 2021 թվականի հունիսի 20-ին իր և Հռիփսիմե Նորայրի Ավետիսյանի միջև կնքված հավատարմագրային կառավարման պայմանագիրը, որի Հավելված 1-ով հաստատված են թվով 8 ընկերությունները, որոնց բաժնեմասի հավատարմագրային կառավարումը Գուրգեն Արսենյանի կողմից հանձնվել է Հռիփսիմե Նորայրի Ավետիսյանին, այդ թվում նաև վարույթում քննարկվող «Յունիքորն Գրուպ» ՓԲ, «Յունիքորն Սերվիս» ՍՊ և «Վկրեդիտ 24» ՍՊ ունեցած բաժնեմասերը:

III. Աժ պատգամավորի գործունեությանն առնչվող տեղեկություններ

ՀՀ Ազգային ժողովի պաշտոնական կայքից (<http://www.parliament.am/deputies.php?sel=details&ID=1455&lang=arm>) իրական ռեժիմում ստացված տեղեկատվության համաձայն՝ Գուրգեն Արսենյանը 2021 թվականի հունիսի 20-ին Աժ պատգամավոր է ընտրվել «Քաղաքացիական պայմանագիր» կուսակցության համապետական ընտրական ցուցակով: 2021 թվականի օգոստոսի 2-ից փաստացի ստանձնել է Ազգային ժողովի պատգամավորի պաշտոնը:

IV. Վարույթի համար էական նշանակություն ունեցող փաստեր

1. Գուրգեն Բաբկենի Արսենյանը Ազգային ժողովի պատգամավորի պաշտոնը ստանձնել է **2021 թվականի օգոստոսի 2-ին:**

2. Վարույթի իրականացման շրջանակներում Իրավաբանական անձանց պետական ռեգիստրի հարթակում տվյալների ուսումնասիրությունից պարզ է դարձել, որ

Գուրգեն Բաբկենի Արսենյանը 2016 թվականի դեկտեմբերի 28-ից հանդիսանում է «Յունիքորն Սերվիս» ՍՊ ընկերության (ՀՎՀՀ 00161529) 100 %-ի բաժնետեր, Իրավաբանական անձանց պետական ռեգիստրի հարթակում տվյալների ուսումնասիրությունից պարզ է դարձել, որ Գուրգեն Արսենյանը հանդիսանում է «Յունիքորն Գրուպ» ՓԲ ընկերության (ՀՎՀՀ 00087766) 100 %-ի բաժնետեր, իսկ Հայտարարագրի Բ.3.1 «Բաժնային արժեթղթեր և այլ ներդրումներ» բաժնի ուսումնասիրությունից պարզ է դարձել, որ Գուրգեն Արսենյանը հանդիսանում է «Վկրեդիտ 24» ՍՊ ընկերության 13 % բաժնետեր:

3. Վարույթի իրականացման շրջանակներում Հայաստանի Հանրապետության հարկային ծառայության ՀՀ հարկ վճարողների փնտրման համակարգում տվյալների ուսումնասիրությունից պարզ է դարձել, որ «Յունիքորն Գրուպ» ՓԲ և «Յունիքորն Սերվիս» ՍՊ ընկերությունները հանդիսանում են «գործող» կարգավիճակ ունեցող ընկերություններ:

4. Գուրգեն Բաբկենի Արսենյանը իր 2021 թվականի տարեկան շահերի հայտարարագրում «Դ.1 Մասնակցությունը առևտրային կազմակերպություններում», և «Դ.3 Պաշտոն զբաղեցնող անձի մասնակցությամբ առևտրային կազմակերպությունում բաժնեմասը հավատարմագրային կառավարման հանձնելը» բաժիններում նշված ընկերությունների վերաբերյալ տվյալներ չի ներկայացրել:

5. 2023 թվականի հունվարի 16-ին Գուրգեն Բաբկենի Արսենյանի կողմից Մ-178-2023 գրությամբ Հանձնաժողով է ներկայացվել 2021 թվականի հունիսի 20-ին կնքված հավատարմագրային կառավարման պայմանագիր, որի համաձայն, «Յունիքորն գրուպ» ՓԲ, «Յունիքորն Սերվիս» ՍՊ, «Վ-կրեդիտ-24» ՍՊ ընկերությունների իր բաժնեմասերը Գուրգեն Բաբկենի Արսենյանը հանձնել է հավատարմագրային կառավարման:

6. Գուրգեն Արսենյանը Հայտարարագրում «Բ.3.3 Պարտքային և այլ արժեթղթեր» բաժնում ներկայացրել է տվյալ 2021 թվականին 6,100,000.00 ԱՄՆ դոլար արժողությամբ արժեթուղթ ձեռք բերելու վերաբերյալ, որպես գործարքի մյուս կողմ նշելով Նյու Յորք Nasdaq միջազգային բորսայի կարգավիճակ ունեցող ընկերությունը: Նշված արժեթղթի վերաբերյալ այլ տվյալներ Գուրգեն Արսենյանի հայտարարագրում առկա չեն: Նշվածի կապակցությամբ 2023 թվականի փետրվարի 7-ին Հանձնաժողովի կողմից Ե-01/242-2023 գրությամբ Գուրգեն Բաբկենի Արսենյանից հայցվել է պարզաբանում՝ վերոնշյալ գործարքին ուղղված նրա էլեկտրոնային հաշվից կատարված բոլոր գործարքների

վերաբերյալ քաղվածքները (այդ թվում վճարման փաստը հաստատող) պարզաբանմամբ Հանձնաժողով ներկայացնելու պահանջով:

V. Անհամադրելիության պահանջին առաջադրվող՝ ներպետական օրենսդրական կարգավորումներ

1. Սահմանադրության 95-րդ հոդվածով սահմանված է, որ պատգամավորը չի կարող զբաղեցնել իր կարգավիճակով չպայմանավորված պաշտոն պետական կամ տեղական ինքնակառավարման այլ մարմիններում, որևէ պաշտոն՝ առևտրային կազմակերպություններում, **զբաղվել ձեռնարկատիրական գործունեությամբ**, կատարել վճարովի այլ աշխատանք, բացի գիտական, կրթական և ստեղծագործական աշխատանքից:

2. «Հայաստանի Հանրապետության Ազգային ժողովի պատգամավորի գործունեության երաշխիքների մասին» օրենքի 2-րդ հոդվածի 1-ին և 2-րդ մասերով ամրագրված է.

«1. Սահմանադրության 95-րդ հոդվածին համապատասխան՝ պատգամավորը չի կարող զբաղեցնել իր կարգավիճակով չպայմանավորված պաշտոն պետական կամ տեղական ինքնակառավարման այլ մարմիններում, որևէ պաշտոն՝ առևտրային կազմակերպություններում, զբաղվել ձեռնարկատիրական գործունեությամբ, կատարել վճարովի այլ աշխատանք, բացի գիտական, կրթական և ստեղծագործական աշխատանքից:

2. Պատգամավորական մանդատն ստանալուց հետո՝ **մեկ ամսվա ընթացքում, պատգամավորը պարտավոր է՝**

- 1) դուրս գալ անհատ ձեռնարկատիրոջ պետական հաշվառումից,
- 2) ազատվել առևտրային կազմակերպություններում զբաղեցրած պաշտոնից,
- 3) **դուրս գալ առևտրային կազմակերպություններից կամ դրանց կանոնադրական կապիտալում իր բաժնեմասն ամբողջությամբ հանձնել հավատարմագրային կառավարման,**

4) հրաժարվել առևտրային կազմակերպությունում ուրիշի գույքի հավատարմագրային կառավարումից,

5) ազատվել պետական կամ տեղական ինքնակառավարման մարմիններում զբաղեցրած պաշտոններից, բացառությամբ սույն հոդվածի 5-րդ մասում նշված պաշտոնների,

6) ազատվել վճարովի հիմունքներով աշխատանքից, բացառությամբ գիտական, կրթական կամ ստեղծագործական աշխատանքի:»:

3. Նույն օրենքի 6-րդ հոդվածով սահմանված է նաև, որ «Հայաստանի Հանրապետության Ազգային ժողովի պատգամավորի գործունեության երաշխիքների մասին» օրենքի իմաստով՝ ձեռնարկատիրական գործունեություն, ինչպես նաև գիտական, կրթական կամ ստեղծագործական աշխատանք է համարվում «**Հանրային ծառայության մասին**» օրենքով սահմանված համապատասխան գործունեությունը կամ աշխատանքը:

4. «**Հանրային ծառայության մասին**» օրենքի (այսուհետ՝ Օրենք) 4-րդ հոդվածի 2-րդ մասի համաձայն՝ **հանրային պաշտոնը** դասակարգվում է խմբերի՝ **պետական** և համայնքային: Նույն հոդվածի համաձայն՝ պետական պաշտոնները դասակարգվում են տեսակների՝ **քաղաքական**, վարչական, ինքնավար և հայեցողական:

5. Օրենքի 5-րդ հոդվածի 2-րդ մասի համաձայն՝ Ազգային ժողովի պատգամավորի պաշտոնը հանդիսանում է **պետական քաղաքական պաշտոն**:

6. Օրենքի (մինչև «Հանրային ծառայության մասին» օրենքում լրացումներ և փոփոխություններ կատարելու մասին») 2022 թվականի դեկտեմբերի 7-ի ՀՕ-540-Ն օրենքի ուժի մեջ մտնելը գործող խմբագրությամբ) 31-րդ հոդվածի 1-ին մասի համաձայն՝ **հանրային պաշտոն զբաղեցնող անձինք** (բացառությամբ համայնքի ավագանու անդամների) և հանրային ծառայողները **չեն կարող** զբաղեցնել իրենց կարգավիճակով չպայմանավորված պաշտոն պետական կամ տեղական ինքնակառավարման այլ մարմիններում, որևէ պաշտոն՝ առևտրային կազմակերպություններում, **զբաղվել ձեռնարկատիրական գործունեությամբ**, կատարել վճարովի այլ աշխատանք, բացի գիտական, կրթական և ստեղծագործական աշխատանքից:

7. Նույն հոդվածի 5-րդ մասի համաձայն՝ հանրային պաշտոն զբաղեցնող անձինք և հանրային ծառայողները պաշտոնում **նշանակվելուց (ընտրվելուց) հետո՝ մեկ ամսվա**

ընթացքում, պարտավոր են ապահովել սույն հոդվածի 1-ին մասով սահմանված պահանջների կատարումը:

8. Նույն հոդվածի 7-րդ մասի 3-րդ կետի համաձայն՝ սույն օրենքի իմաստով՝ ձեռնարկատիրական գործունեություն է համարվում (...) **առևտրային կազմակերպության մասնակից լինելը**, բացառությամբ այն դեպքի, երբ առևտրային կազմակերպության մասնակցի բաժնեմասն ամբողջությամբ հանձնվել է հավատարմագրային կառավարման:

9. ՀՀ քաղաքացիական օրենսգրքի 954-րդ հոդվածի 1-ին մասի համաձայն՝ գույքի հավատարմագրային կառավարման պայմանագրով մեկ կողմը (կառավարման հիմնադիրը) որոշակի ժամկետով գույք է հանձնում մյուս կողմի (հավատարմագրային կառավարչի) հավատարմագրային կառավարմանը, իսկ մյուս կողմը պարտավորվում է այդ գույքի կառավարումն իրականացնել ի շահ կառավարման հիմնադրի կամ նրա նշած անձի (շահառուի):

10. «Կոռուպցիայի կանխարգելման հանձնաժողովի մասին» օրենքի 27-րդ հոդվածի 1-ին մասի համաձայն՝ ի թիվս այլ դեպքերի, Հանձնաժողովը կարող է անհամատեղելիության պահանջների, այլ սահմանափակումների, վարքագծի կանոնների խախտումների և իրավիճակային շահերի բախման վերաբերյալ վարույթներ հարուցել **Հանձնաժողովի նախաձեռնությամբ՝ հայտարարագրերը վերլուծելիս առերևույթ խախտումներ կամ դեպքեր հայտնաբերելու դեպքում**:

11. «Կոռուպցիայի կանխարգելման հանձնաժողովի մասին» օրենքի 33-րդ հոդվածի համաձայն՝ Հանձնաժողովը վարույթի արդյունքում խախտման կամ դեպքի վերաբերյալ ընդունում է եզրակացություն:

Նույն հոդվածի 2-րդ մասի համաձայն՝ վարույթի արդյունքում Հանձնաժողովն ընդունում է եզրակացություն պաշտոն զբաղեցնող անձի կողմից անհամատեղելիության պահանջների կամ այլ սահմանափակումների խախտման առկայության կամ բացակայության մասին կամ համապատասխան պաշտոն զբաղեցնող անձի կողմից վարքագծի կանոնների խախտման առկայության կամ բացակայության մասին, իսկ իրավիճակային շահերի բախման դեպքի կապակցությամբ՝ շահերի բախման իրավիճակի առկայության կամ բացակայության մասին:

VI. Հանձնաժողովի պատճառաբանություններն ու եզրահանգումը.

1. Պատգամավորի հանրային պաշտոնը զբաղեցնող անձանց համար ձեռնարկատիրական գործունեությամբ զբաղվելու սահմանափակումն ամրագրված է ինչպես Սահմանադրությամբ, այնպես էլ «Հայաստանի Հանրապետության Ազգային ժողովի պատգամավորի գործունեության երաշխիքների մասին» օրենքով և «Հանրային ծառայության մասին» օրենքով:

2. Ձեռնարկատիրական գործունեությամբ զբաղվելու սահմանափակումը, մասնավորապես, չի արգելում հանրային պաշտոն զբաղեցնող անձանց և հանրային ծառայողներին որպես սեփականություն ունենալ բաժնեմաս առևտրային կազմակերպությունում: Ավելին, օրենսդիրը չի զրկում հանրային պաշտոն զբաղեցնող անձանց և հանրային ծառայողներին սեփականության իրավունքով իրենց պատկանող գույքը օգտագործելու և տնօրինելու իրավունքից, այլ տվյալ պաշտոնը զբաղեցնելու հանգամանքով պայմանավորված՝ նախատեսում է օրենքի իմաստով ձեռնարկատիրական գործունեություն համարվող առևտրային կազմակերպությունում ունեցած բաժնեմասնակցության տնօրինման կոնկրետ եղանակ, այն է, պաշտոնում նշանակվելուց (ընտրվելուց) հետո՝ մեկ ամսվա ընթացքում առևտրային կազմակերպության մասնակցի բաժնեմասն (բաժնետոմս, փայ) ամբողջությամբ հանձնել հավատարմագրային կառավարման:

3. Գույքի տնօրինման կոնկրետ եղանակ սահմանելուն զուգահեռ օրենսդիրը հանրային և հանրային ծառայության պաշտոն զբաղեցնող անձանց համար սահմանել է համապատասխան երաշխիքներ, համաձայն որոնց՝ վերջիններս հնարավորություն կունենան պաշտոնի նշանակվելուց կամ ընտրվելուց հետո մեկամսյա ժամկետում վերացնելու իրենց զբաղեցրած պաշտոնի հետ անհամատեղելի այլ գործունեությունը, դրանով իսկ բացառելով կամ նվազագույնի հասցնելով հանրային և հանրային ծառայության պաշտոն զբաղեցնող անձանց մոտ շահերի բախման իրավիճակները: Նման կարգավորումները որևէ կերպ չեն խաթարում անձի՝ Սահմանադրությամբ ամրագրված, սեփականության հիմնարար իրավունքը, քանի որ անձը, հանձնելով առևտրային կազմակերպությունում իր բաժնեմասը հավատարմագրային կառավարման, չի փոխանցում իր սեփականության իրավունքը հավատարմագրային կառավարչին, այլ այդ կերպ իրացնում է իր այդ իրավունքը:

4. Ազգային ժողովի պատգամավորն ունի պետական իշխանության օրենսդիր, ներկայացուցչական մարմնի անդամի սահմանադրաիրավական կարգավիճակ, ինչն անհամատեղելի է գործունեության որոշակի տեսակների հետ: Հանրային պաշտոն զբաղեցնող անձանց համար օրենսդրությամբ սահմանված որոշակի արգելքների ու սահմանափակումների հիմնական նպատակը **կոռուպցիայի կանխարգելումն է, այդ թվում՝ շահերի հնարավոր բախման իրավիճակների բացառումը:**

Իրավական սահմանափակումների ներքո ենթադրվում է, որ պաշտոնավարման ողջ ժամանակահատվածում հանրային պաշտոն զբաղեցնող անձը պարտավորվում է գործունեություն իրականացնել իր պաշտոնի նկատմամբ սահմանված իրավական որոշակի սահմանափակումների շրջանակներում: Հետևաբար, ընտրվելով հանրային պաշտոնում՝ իրավունքների ու պարտականությունների հետ մեկտեղ պատգամավորը ստանձնում է բազմատեսակ սահմանափակումների ներքո գործելու պարտականություն, որը հետապնդում է խորհրդարանում պատգամավորի կողմից բացառապես օրենսդիր և ներկայացուցչական գործառույթների իրականացումն ապահովելու և ձեռնարկատիրական գործունեությամբ զբաղվող անձանց մուտքը խորհրդարան բացառելու օրինաչափ նպատակը:

5. Վերլուծելով սույն գործով կիրառելի օրենսդրական կարգավորումները, պարզ է դառնում, որ օրենսդիրը սահմանել է հստակ ժամկետ՝ առևտրային կազմակերպության մասնակցի բաժնեմասը հավատարմագրային կառավարման հանձնելու համար, և տվյալ հնարավորությունը սահմանափակել է անձի՝ հանրային կամ հանրային ծառայության պաշտոնում նշանակվելու (ընտրվելու) դեպքով: Այսինքն, օրենսդիրը սահմանել է պայմաններ հանրային կամ հանրային ծառայության պաշտոն զբաղեցնող անձի՝ առևտրային կազմակերպությունում մասնակցությունը ձեռնարկատիրական գործունեություն չհամարվելու համար: Դրանք են՝ երբ անձը մասնակից է եղել առևտրային կազմակերպությանը մինչև պաշտոնի նշանակվելը և, երբ պաշտոնի նշանակելուց հետո առևտրային կազմակերպության մասնակցի բաժնեմասն օրենքով սահմանված ժամկետում ամբողջությամբ հանձնվել է հավատարմագրային կառավարման:

6. Այսպես, 2021 թվականի օգոստոսի 2-ից Գուրգեն Արսենյանը ստանձնել է ՀՀ ազգային ժողովի պատգամավորի պաշտոնը, այսինքն հանդիսանում է պետական քաղաքական պաշտոն զբաղեցնող հանրային ծառայող, և նրա գործունեության

նկատմամբ տարածվում են Սահմանադրության 95-րդ, «Հայաստանի Հանրապետության Ազգային ժողովի պատգամավորի գործունեության երաշխիքների մասին» օրենքի 2-րդ, և Օրենքի 31-րդ հոդվածների կարգավորումները, ինչը նշանակում է, որ 2021 թվականի օգոստոսի 2-ին ՀՀ ազգային ժողովի պատգամավորի պաշտոնը ստանձնելուց հետո մեկ ամսվա ընթացքում օրենքով սահմանված կարգով «Յունիքորն Գրուպ» ՓԲ և «Յունիքորն Սերվիս» ՍՊ ընկերություններում իր ունեցած բաժնեմասերը պարտավոր էր ամբողջությամբ հանձնել հավատարմագրային կառավարման: Այնուամենայնիվ, Հանձնաժողովը հարկ է համարում վերոնշյալ փաստերը և դրանց վերաբերելի իրավակարգավորումները վերլուծել օրենքի ձևական և բովանդակային տեսանկյունից:

7. Տվյալ պարագայում, սույն վարույթի ընթացքում ձեռք բերված փաստական տվյալներից, մասնավորապես, Գուրգեն Արսենյանի կողմից պարզաբանմամբ ներկայացված փաստաթղթերի ուսումնասիրությունից պարզ է դարձել, որ Գուրգեն Արսենյանի կողմից «Յունիքորն գրուպ» ՓԲ, «Յունիքորն Սերվիս» ՍՊ, «Վ-կրեդիտ-24» ՍՊ ընկերություններում ունեցած բաժնեմասերը 2021 թվականի հունիսի 20-ին 5 տարի ժամկետով հանձնված են եղել հավատարմագրային կառավարման:

Գուրգեն Արսենյանն Ազգային ժողովի պատգամավորի պաշտոնը ստանձնել է **2021 թվականի օգոստոսի 2-ին**, այսինքն «Յունիքորն գրուպ» ՓԲ, «Յունիքորն Սերվիս» ՍՊ, «Վ-կրեդիտ-24» ՍՊ ընկերությունների կանոնադրական կապիտալում իր բաժնեմասերը Գուրգեն Արսենյանի կողմից պատգամավորական մանդատը ստանձնելիս, արդեն իսկ հանձնված են եղել հավատարմագրային կառավարման: Հանձնաժողովն արձանագրում է, որ, ըստ էության, Գուրգեն Արսենյանի կողմից դեռևս ՀՀ ազգային ժողովի պատգամավորի պաշտոնը ստանձնելուց առաջ ձեռնարկվել են անհամատեղելիության պահանջներ սահմանող իրավանորմերի պահպանմանն ուղղված համապատասխան քայլեր՝ Ընկերությունների կանոնադրական կապիտալում իր բաժնեմասերը հավատարմագրային կառավարման հանձնելու ուղղությամբ:

Վերոնշյալ փաստերի վերլուծության արդյունքում Հանձնաժողովը եզրակացնում է, որ Գուրգեն Արսենյանի կողմից չեն խախտվել հանրային պաշտոն զբաղեցնող անձին ներկայացվող անհամատեղելիության պահանջները:

Արդյունքում, սույն վարույթի շրջանակներում պարզված փաստական հանգամանքների համադրումից և վերոնշյալ իրավական նորմերի վերլուծությունից

Հանձնաժողովը **եզրահանգում է**, որ սույն գործով քննարկված փաստական հանգամանքների շրջանակներում Գուրգեն Արսենյանն իր գործողություններով պահպանել է Օրենքի 31-րդ հոդվածի 1-ին մասով հանրային պաշտոն զբաղեցնող անձի համար սահմանված անհամատեղելիության պահանջները:

Հաշվի առնելով վերոգրյալ հիմնավորումները և ղեկավարվելով «Կոռուպցիայի կանխարգելման հանձնաժողովի մասին» օրենքի 22-րդ հոդվածի 1-ին մասի 2-րդ կետով, 24-րդ հոդվածի 1-ին մասի 1-ին կետով, 33-րդ հոդվածի 2-րդ մասով՝ Հանձնաժողովը, գնահատելով գործում առկա ապացույցները, բոլոր հանգամանքների համակողմանի, լրիվ և օբյեկտիվ հետազոտման վրա հիմնված ներքին համոզմամբ՝

ԵԶՐԱԿԱՑՆՈՒՄ Է.

Ազգային ժողովի պատգամավոր Գուրգեն Արսենյանի կողմից չեն խախտվել հանրային պաշտոնին օրենսդրությամբ ներկայացվող անհամատեղելիության պահանջները:

ՀԱՆՁՆԱԺՈՂՈՎԻ ՆԱԽԱԳԱՀ՝



ՀԱՅԿՈՒՀԻ ՀԱՐՈՒԹՅՈՒՆՅԱՆ